

Magdalena Razbadauskienė

(Klaipėdas r.)

UOBOLS NU UOBĒLĒIS...

Nukrėtau
Nurėitiejau.
Daužė šuonus
Gīvenėma viejė.

Vėina posė geltuona,
Kėta tomsinta žalė,
Ē ruožielis rauduons
Kuokėi painė lėkėma kelė.

Kuoks babūtumi
Pėkts a smūtnos,
Rasiet prikaupės geroma,
Pagatavs prabuočitė vėsims.

Ēr i patė bjauriausė
Gīvenėma kertė isprausts,
To esi uobols
Nu sava uobėlėis...

SVĒRTĒS

Kap gīvenėma svarstīklės:
Aukštīn – žemīn,
Daugiau – mažiau.

Pruotīngiusė būto
Par vėdori
Posiausvėra ēšlaikītė,

Bet posiausvėruo
Napasėmsi vondėns, bruolīti.

RUOKA NAKTIS PLATELIŪS

Mošamėjė pragara ritma kal,
Vo ont vėršaus vėrkau gitaras
Iš Pėlėis saluos
Lietā i dongo plauk
Zėfrinas vielie
So mienesė bokalo ronkuos.

Sied liūdns Gervazos
Ont tėlta
Klausuos vėrtuoza rauduos
Ē miegėn soprastė,

Kāp žmuogos torieto gīventė,
Ka dūšės ramībė rastu.

RODOU

Nulingava, nubangava
Gerviu liūdnos klīksmos.

Šiaurės vies po lonka tronkuos
Ēr ont vėsū šauk:
– Grėta pasėtrauk.

Biekėt gielės ē ougelės,
Lapā paskotėnė.
Biekėt vasaras naktėlės;
Vėskas – tik prėsėmėnėmā.

Kažkuo baisė, kažkuo gailė.
Laiks so paukštės
Lek – nebsogrīš; žėnā.

Metus plieša liūdnos spalis.
Vo i longa brazdėn žėima.
A žėnā?..

SNING

Veiziek,
Kāp aniuolā
Plunksnelės paša
Ligo daugībė balondiū
Po dongu
Klajuotu atsėpūtė
Ba tėksla,
Ba plana.

Ē tēp liūdņė,
Ka žmuogo
Vėsumet kor nuors ispraud,
Taisīkliems ē istatīmās sovarža.

Nieka šėndėina
Neimso i kramė,
Išėso i lauka atsėpūtė
Ba tėksla,
Ba plāna.

Paveiziek, kāp aniuolā
Plunksnelės paša.

Vilija Lukauskienė



(Klaipėdas r.)

ŽEMAITIŠKI PUOTERĒ

Žemaitiški puoterė karuolės nubieg
Kap tīrs šaltėni vondou.
Geru i savi iki dogna kas dėina –
Pilnie mona maldū dubou.

Žemaitiški puoterė ēn par šėrdi
Tīromo, kap plunksna balta.
Kap gerā išgalōsts peilis,
Lūpas didžioujes maldo.

Žemaitiški puoterė – tikroms, stipribė
Gomulu gerklie pastring geromu.
Ēnu pramintuom švėisuliū pieduom
Iki širdėis, iki pruotievu šaknū.

GEGOŽIS

Basibaigontuos šėltuos dėinuos vakars.
Už nugolusiu debesū saulė slepas iš lieta.
Dongaus žīdroms tomsie, raust,
Spalvū spindesis sava žavesi mieta.

Žėidlapės rausvās vobelū bėrstontės
Violetiniem alīvū kekiem,
Geltuonuom kiaulpėiniū galvuom ērstontiuom,
Baltuom žīdončiū kaštuonu žvakieim.

Vėsa lauka užpėlda žali žaluma
Smaragdinė, švelni, žalsva spalva.
Mon patink gegožis pavasari,
Mon tada nikumeta neskaud galva.